

27 JUL 2001

Tabung

PM LANCAR TABUNG KEBAJIKAN PELAJAR AHAD INI

SEREMBAN, 27 Julai (Bernama) -- Perdana Menteri Datuk Seri Dr. Mahathir Mohamad akan melancarkan Tabung Kebajikan Pelajar Kolej Tunku Kurshiah (KTK) pada majlis jamuan malam di Hotel Hilton Seremban di sini Ahad ini.

Pengetua kolej itu Rokiah Alias hari ini berkata isteri Perdana Menteri Datin Seri Dr. Siti Hasmah Mohamad Ali serta Menteri Besar Tan Sri Mohamed Isa Abdul Samad dan isteri Datin Sri Hazizah Tumin juga dijadual hadir.

Katanya pada majlis itu Perdana Menteri akan menerima cek sumbangan penderma untuk Tabung Kebajikan Pelajar KTK manakala Dr Siti Hasmah selaku Penaung Kehormat Pancaragam KTK akan menerima cek sumbangan penderma untuk Tabung Pancaragam KTK.

Menurutnya majlis itu akan diserikan dengan persembahan Orkestra KTK dan artis jemputan.

Rokiah berkata penubuhan tabung itu merupakan satu projek usahasama antara Persatuan Ibu Bapa dan Guru (PIBG) dan kolej itu bagi memperolehi sejumlah dana untuk satu jangka masa panjang.

Katanya dana itu akan dijadikan pemangkin kepada kecemerlangan berterusan pelajar dalam bidang kurikulum dan kokurikulum.

Menurutnya selain pemantapan berterusan aktiviti kurikulum, kolej itu juga memberi imej baru kepada kecemerlangan di bidang kokurikulum dengan penubuhan pasukan Orkestra KTK bertujuan antara lain mengembangkan bakat pelajar serta membuat persembahan untuk acara kolej dan luar kolej.

Sementara itu, Perdana Menteri dalam kata-kata aluannya pada buku cenderamata sempena majlis pelancaran tabung itu berkata tabung itu diharap dapat menjaga kebajikan pelajar terutama yang kurang berkemampuan.

Katanya tabung itu juga diharap dapat digunakan untuk sebarang program yang dapat meningkatkan kecemerlangan pelajar dalam bidang akademik dan kegiatan kokurikulum.

Beliau berharap semua pelajar khususnya di KTK mempergunakan sepenuhnya peluang belajar dan kemudahan yang disediakan oleh kerajaan untuk menuntut ilmu dengan bersungguh-sungguh.

"Jangan sia-siakan harapan ibu bapa kita untuk melihat kita menjadi rakyat yang berjaya dan berguna kepada bangsa dan negara pada masa hadapan," katanya.

-- BERNAMA

RP NMO